

# **Memperkasakan Doktrin Kelahiran Kembali di Gereja-Gereja Baptis Sabah**

*Oleh:  
Ps. Nicholas Sigurong*

## **Abstrak**

Artikel ini membincangkan tentang pemahaman dan pemeraksanaan Doktrin Kelahiran Kembali dalam kalangan gereja-gereja Baptis di Sabah. Terdapat kekeliruan mengenai identiti seorang Kristian, di mana banyak yang menganggap diri mereka Kristian melalui kelahiran dalam keluarga Kristian, penyertaan dalam ritual gereja, atau hanya dengan mengucapkan “doa terima Yesus”. Artikel ini menegaskan bahawa kelahiran kembali adalah titik permulaan sebenar kehidupan seorang Kristian yang sejati. Melalui kajian ini, penulis menilai tahap pemahaman umat Baptis tentang Doktrin Kelahiran Kembali, termasuk kesalahpahaman umum dan cabaran dalam pengajaran doktrin tersebut di gereja-gereja Baptis di Sabah.

Artikel ini turut membincangkan isu murtad dalam konteks doktrin ini serta menyeru para pastor dan gereja Baptis untuk memperkukuhkan pengajaran mengenai kelahiran kembali. Kajian menggunakan kaedah kualitatif dengan data yang dikumpul melalui temu ramah dengan jemaat gereja. Hasil kajian menunjukkan bahawa terdapat pemahaman asas tentang doktrin ini, namun penekanan dan pengajaran yang lebih mendalam masih diperlukan untuk memperkasakan pemahaman ini. Artikel ini mengemukakan cadangan untuk memperkasakan Doktrin Kelahiran Kembali melalui khutbah, pengajaran di peringkat akar umbi, dan seminar, demi memastikan identiti Kristian yang sejati dalam kalangan umat Baptis di Sabah.

**Kata kunci:** Doktrin Kelahiran Kembali, Gereja Baptis, Pemahaman Kristian, Murtad, Pemeraksanaan Teologi

## **Pengenalan**

Terdapat beberapa tanggapan yang salah tentang identiti seorang kristian. Yang pertama, kesalahfahaman bahawa menjadi orang Kristian adalah apabila seseorang lahir di dalam keluarga Kristian. Kedua, seseorang itu dianggap sudah menjadi Kristian apabila sudah melalui atau melakukan upacara-upacara ritual kudus yang dianjurkan gereja seperti kelas katekisme, baptisan, penetapan

dan sebagainya. Yang ketiga, di dalam era moden ini, model-model penginjilan yang menginginkan hasil yang segera melakukan cara-cara seperti memanggil atau mencabar orang untuk mengucapkan doa terima Yesus (*Sinner's Prayer*) dimana setelah seseorang melakukan hal itu, si pengkhotbah begitu lekas menyatakan bahawa orang yang mengucapkan doa itu sebagai sudah menjadi orang Kristian.

Hal ini menjadi masalah besar kerana Kristian menjadi sebatas agama sahaja dan bukan lagi soal hubungan peribadi yang nyata dengan Allah. Apa yang diabaikan oleh semua yang disebut di atas ialah konsep kelahiran kembali. Kelahiran kembali adalah titik sebenar permulaan seorang Kristian yang sejati.<sup>1</sup> Oleh itu kajian ini akan melihat sejauh mana pemahaman orang-orang Kristian khususnya orang-orang Baptis tentang Doktrin Kelahiran Kembali. Adakah doktrin ini telah dilupakan dan adakah pengajaran tentang doktrin ini cukup mantap sehingga difahami oleh umat Baptis.

### Latarbelakang Denominasi Baptis Di Sabah

Sejarah gereja-gereja Baptis di Malaysia bermula hasil daripada misi orang imigran Baptis dari Swatow, China pada tahun 1905.<sup>2</sup> Kisah bermula apabila Encik Oh Hock Teck dan keluarganya daripada Swatow China datang ke Malaya untuk memulakan hidup baru. Gereja Baptis pertama ditubuhkan di Alor Setar, Kedah iaitu pada 21 Oktober tahun 1938 dengan nama Kedah Oversea-Chinese Baptist Church yang kemudiannya dinamakan Oversea-Chinese Swatow Baptist Church.<sup>3</sup> Sejak itu gereja-gereja Baptis terus ditanam di Semenanjung Malaysia dengan dibantu Lembaga Misi Luar Negara (*Foreign Mission Board*).

Di sebelah timur Malaysia, Gereja Baptis mula menapak di Sabah pada awal era 60-an. Pada tahun 1964, Lembaga Misi Luar Negara (FMB) telah menghantar Carl dan Mary Yamell ke Jesselton (kini Kota Kinabalu) untuk memulakan misi di Sabah.<sup>4</sup> Setahun selepas itu iaitu pada 21 Mac 1965 ditubuhkan Gereja Baptis pertama

---

<sup>1</sup> Sproul, R.C., *What Does It Mean to Be Born Again*, (MI: Grand Rapids, 2010), 24.

<sup>2</sup> Brackney, William H., *Historical Dictionary of the Baptists*, (USA: Scarecrow Press, 2009), 362

<sup>3</sup> Bobby and Dorothy Evans, *Great Things He Has Done!* (Petaling Jaya: MBC, 2003), 22.

<sup>4</sup> Bobby and Dorothy Evans, 34.

di Sabah iaitu Gereja Baptis Jesselton yang kemudian ditukar nama kepada Gereja Baptis Likas tiga tahun sesudah itu iaitu pada tahun 1965.<sup>5</sup> Sejak itu penanaman gereja terus dilakukan di Sabah dan kini sudah terdapat lebih 25 buah gereja Baptis di seluruh Sabah.

### **Kepentingan Kajian**

Setelah beberapa dekad gereja-gereja Baptis di Sabah telah melalui fasa pertumbuhan yang baik. Generasi kristian yang pertama adalah mereka yang menerima Injil pada mulanya yang kebanyakannya meninggalkan kepercayaan lama seperti animisme, agama pagan atau kepercayaan-kepercayaan lain. Selalunya generasi pertama ini adalah orang-orang yang benar-benar komited mengikuti Tuhan dan telah dilahirkan kembali. Setelah generasi pertama, menyusul generasi kedua, ketiga dan seterusnya yang lahir dari generasi pertama. Generasi yang seterusnya inilah yang dianggap Kristian secara kelahiran. Orang-orang yang lahir dan membesar dalam komuniti kristian menganggap diri mereka sudah menjadi kristian tetapi sebenarnya belum mengalami kelahiran kembali.

Isu lain yang sering terjadi dalam kalangan orang Kristian yang hidup dalam suatu masyarakat majmuk adalah masalah murtad dan pindah agama. Ramai orang mengaitkan isu murtad dan pindah agama sebagai isu biasa yang didorong oleh berbagai faktor luaran seperti perkahwinan, dakwah agama lain, ganjaran dan sebagainya. Namun dalam kajian ini, isu ini akan dilihat dari sudut Doktrin Kelahiran Kembali. Isunya adalah adakah benar orang yang murtad dan pindah agama itu orang yang telah dilahirkan kembali atau bolehkah orang yang telah dilahirkan kembali murtad dan berpaling daripada Yesus?

Oleh itu, kajian ini penting untuk menggesa supaya gereja-gereja Baptis khususnya para pastor menilai pertumbuhan jemaat mereka secara rohani. Adakah jemaat mereka sudah benar-benar mengalami kelahiran kembali? Adakah Doktrin Keselamatan diajarkan dengan baik dan jelas? Adakah jemaat sudah tahu bahawa orang Kristian yang sejati adalah orang-orang yang telah dilahirkan kembali? Kajian ini adalah untuk menggesa supaya gereja-gereja Baptis di Sabah memperkasakan Doktrin Kelahiran Kembali di gereja mereka.

---

<sup>5</sup> Bobby and Dorothy Evans, 34.

### Batasan Kajian

Ada beberapa batasan di dalam kajian ini. Yang pertama, sampel kajian hanya terbatas kepada beberapa gereja Baptis di Sabah sahaja. Sampel kajian tidak secara menyeluruh daripada seluruh negeri Sabah. Gereja-gereja Baptis yang dipilih juga adalah dari kalangan gereja-gereja bumiputera. Walau bagaimanapun, penulis yakin sampel kajian dapat memberi gambaran tentang tahap kefahaman umat Baptis tentang Doktrin Kelahiran Kembali secara keseluruhannya kerana gereja Baptis di Sabah belum begitu banyak.

Yang kedua, kaedah pengumpulan data adalah berdasarkan temu ramah secara tidak formal. Temu ramah ini dijalankan oleh beberapa orang pelajar kelas teologi (para pastor) terhadap jemaat yang mereka gembalakan. Oleh itu data daripada kajian ini tidak secara langsung dikutip oleh penulis sendiri. Namun, penulis sudah menyediakan set soalan dan taklimat kepada pelajar-pelajar sebelum menjalankan temu ramah bagi memudahkan pelajar mendapatkan maklumat yang dikehendaki oleh penulis. Jawapan-jawapan daripada temuramah juga dicatat dan data inilah yang akan dianalisa oleh penulis.

### Perspektif Kontemporari Tentang Topik Kajian

Seperti yang sudah dinyatakan pada bahagian Kepentingan Kajian (Bab 1), generasi yang lahir dalam keluarga Kristian mungkin mempunyai tanggapan bahawa mereka adalah orang Kristian. Melakukan ritual seperti baptisan, pelajaran Alkitab, penetapan gereja memberikan harapan palsu tentang identiti seorang kristian. Begitu juga dengan mereka yang mengangkat tangan atau yang maju ke depan ketika panggilan mimbar (*altar call*) untuk mengikuti mengucapkan doa menerima Yesus berfikir bahawa mereka sudah menjadi kristian. Mengucapkan doa menerima Yesus mungkin membantu banyak orang tetapi ia juga boleh menjadi sesuatu yang hanya agamawi sahaja jika seseorang tidak sungguh-sungguh mengalami iman dan pertaubatan yang dikerjakan Roh Kudus.

Paul Washer memberi komen ini tentang doa terima Yesus (*sinner's prayer*): “Ya, dengan cara yang sama bahawa ketergantungan pada baptisan bayi untuk keselamatan, menurut pendapat saya, adalah anak lembu emas Reformasi, **doa orang berdosa** (*sinner's prayer*) adalah anak lembu emas hari ini untuk Baptis, Injili, dan semua orang yang telah mengikuti mereka. Doa orang berdosa telah mengirim lebih

banyak orang ke neraka daripada apa pun di muka bumi!”<sup>6</sup> Paul Washer berbicara demikian mendakwa bahawa orang Kristian sudah lupa tentang doktrin kelahiran kembali.<sup>7</sup>

Hal ini benar kerana semua yang disebut di atas boleh menjadi harapan dan keyakinan palsu kepada seseorang. Seseorang itu akan menganggap dirinya orang Kristian berdasarkan hal-hal lahiriah tetapi tidak berdasarkan keyakinan iman terhadap Yesus Kristus yang diberitakan melalui perkhayaban Injil. Buah pertaubatan juga tidak kelihatan apabila secara rohaninya mereka masih hidup seperti orang yang tidak mengenal Allah. Akhirnya Kristian hanya dilihat sebagai satu cabang agama dari sekian banyak agama yang ada di dunia. Kristian yang sebenar harus didefinisikan dengan jelas bagi generasi baru ini.

Oleh itu, Doktrin Kelahiran Kembali harus diperkasakan di gereja. Pastor-pastor memainkan peranan penting dalam memastikan doktrin ini diajarkan dengan baik. Pertaubatan dan iman harus dititikberatkan dari mimbar gereja. Sudah tentunya pendekatan penginjilan juga harus disemak semula. Model-model penginjilan yang mempromosikan teologi yang cetek dan mengharapkan hasil yang segera harus ditolak. Umat Baptis harus segera kembali ke dasar Alkitab dan Kristian yang sebenar.

### **Perspektif Alkitabiah tentang Kelahiran Kembali**

Pada bahagian ini akan membahaskan secara Alkitabiah tentang Doktrin Kelahiran Kembali. Pembahasan tentang doktrin ini adalah berdasarkan pegangan secara umum umat Protestan-Injili.

#### **Erti Kelahiran Kembali (Regenerasi)**

Kelahiran kembali atau regenerasi merupakan suatu konsep yang sukar dijelaskan oleh bapa-bapa gereja sejak berkurun lamanya setelah abad pertama. Louis Berkhof dalam buku *Teologi Sistematis*nya berkata: “Dalam fikiran Gereja awal istilah “regenerasi” tidak berdiri dengan konsep yang sangat jelas. Ia digunakan untuk menunjukkan perubahan yang terkait erat dengan penghapusan dosa, dan tidak ada perbezaan yang jelas antara regenerasi dan pembedaan. Bahkan Agustinus tidak menarik garis pemisah yang tajam di sini,

---

<sup>6</sup> Washer, Paul, *Ten Indictments Against the Modern Church*, (USA: HeartCry Missionary Society, 2008), 25.

<sup>7</sup> Washer, Paul, 22.

tetapi membezakan antara regenerasi dan konversi. Baginya regenerasi termasuk, selain pengampunan dosa, hanya perubahan awal dihati, diikuti dengan pertaubatan di kemudian hari. Dia menganggapnya sebagai karya Tuhan yang sangat monergis, di mana manusia tidak dapat bekerjasama, dan yang tidak dapat dilawan oleh manusia.”<sup>8</sup>

Bahkan pada zaman reformasi abad ke-17, pentakrifan tentang kelahiran kembali masih belum jelas. Martin Luther juga tidak terlepas dari kebingungan antara kelahiran kembali dengan pembenaran. Beliau berbicara tentang kelahiran kembali dalam erti yang agak luas. John Calvin juga menggunakan istilah itu dalam pengertian yang sangat komprehensif sebagai penunjukan seluruh proses yang olehnya manusia diperbaharui termasuk di samping tindakan ilahi yang memulai hidup baru, juga pertaubatan dan pengudusan. Beberapa penulis abad ketujuh belas juga gagal membezakan antara regenerasi dan pertaubatan, dan menggunakan kedua istilah tersebut secara bergantian, memperlakukan apa yang sekarang kita sebut regenerasi di bawah panggilan efektif.<sup>9</sup>

Dalam teologi Reformed, kata “kelahiran kembali” umumnya digunakan dalam pengertian yang lebih terbatas, sebagai suatu sebutan dari tindakan ilahi yang dengannya orang berdosa diberkahi dengan kehidupan rohani yang baru, dan dengannya prinsip kehidupan baru itu pertama kali terjadi. Wayne Grudem mendefinisikan kelahiran kembali sebagai “tindakan rahsia Allah di mana Ia memberikan kehidupan rohani yang baru kepada kita.”<sup>10</sup> Christian Robirosa juga seakan menyetujui dengan mentakrifkan kelahiran kembali seperti berikut: “Kelahiran kembali adalah tindakan Allah melalui Roh Kudus-Nya untuk menyelamatkan orang-orang pilihan-Nya dengan memberikan hati yang baru sehingga mereka dapat meresponi panggilan perpalingan dan dapat hidup di dalam seluruh proses keselamatan selanjutnya (Pengudusan). Peristiwa kelahiran kembali ini merupakan sesuatu yang misterius, tidak dapat sepenuhnya dijelaskan bagaimana terjadinya, tetapi DAPAT DILIHAT HASILNYA dengan adanya perpalingan yang sejati di dalam diri seseorang.”<sup>11</sup>

---

<sup>8</sup> Berkhof, Louis, *Systematic Theology*, (MI: Grand Rapids, 1949), 516.

<sup>9</sup> Berkhof, Louis, 516.

<sup>10</sup> Grudem, Wayne, *Systematic Theology: Introduction to Bible Doctrine*, (MI: Inter-Varsity Press, 2000), 606.

<sup>11</sup> Robirosa, Christian S., *Jalan Pasti ke Sorga*, (Batam, Sony Light, 2012), 169.

Jadi dapat disimpulkan bahwa kelahiran kembali adalah pekerjaan Allah melalui Roh Kudus untuk mengubah seseorang untuk percaya dan bertaubat setelah mendengar Injil. Peristiwa kelahiran kembali hanya terjadi satu kali sahaja. Kelahiran kembali adalah suatu mujizat yang luarbiasa dimana Allah menghidupkan seseorang yang mati secara rohani kepada kehidupan yang baru dengan memberi hati yang baru. Inilah yang dijanjikan Allah kepada bangsa Israel di dalam Perjanjian Lama iaitu dalam Yehezkiel 36:26-27 demikian: “Kamu akan Kuberikan hati yang baru, dan roh yang baru di dalam batinmu dan Aku akan menjauhkan dari tubuhmu hati yang keras dan Kuberikan kepadamu hati yang taat. Roh-Ku akan Kuberikan diam di dalam batinmu dan Aku akan membuat kamu hidup menurut segala ketetapan-Ku dan tetap berpegang pada peraturan-peraturan-Ku dan melakukannya.”

Hati yang baru dan Roh Kudus yang tinggal dalam orang percaya adalah hasil daripada kelahiran kembali. Pada hati yang barulah Allah menuliskan Hukum-Nya supaya orang percaya hidup dalam kehendak-Nya. Janji untuk Perjanjian Baru dipetik dari kitab Yeremia 31:31-34 demikian:

“Sesungguhnya, akan datang waktunya, demikianlah firman TUHAN, Aku akan mengadakan perjanjian baru dengan kaum Israel dan kaum Yehuda, bukan seperti perjanjian yang telah Kuadakan dengan nenek moyang mereka pada waktu Aku memegang tangan mereka untuk membawa mereka keluar dari tanah Mesir; perjanjian-Ku itu telah mereka ingkari, meskipun Aku menjadi tuan yang berkuasa atas mereka, demikianlah firman TUHAN. Tetapi beginilah perjanjian yang Kuadakan dengan kaum Israel sesudah waktu itu, demikianlah firman TUHAN: Aku akan menaruh Taurat-Ku dalam batin mereka dan menuliskannya dalam hati mereka; maka Aku akan menjadi Allah mereka dan mereka akan menjadi umat-Ku. Dan tidak usah lagi orang mengajar sesamanya atau mengajar saudaranya dengan mengatakan: Kenallah TUHAN! Sebab mereka semua, besar kecil, akan mengenal Aku, demikianlah firman TUHAN, sebab Aku akan mengampuni kesalahan mereka dan tidak lagi mengingat dosa mereka.”

Inilah erti kelahiran kembali. Oleh itu, menjadi orang Kristian bukan sekadar pada dasar pegangan agama dan terlibat dalam kalangan orang Kristian tetapi telah benar-benar mengalami sesuatu yang ajaib di dalam kehidupan mereka. Hati mereka telah diubah oleh Tuhan. Hasil yang terlihat adalah mereka beriman dan bertaubat. Para ahli teologia Protestan (Arminian dan Calvinis) masih berdebat sama ada beriman dan bertaubat mendahului kelahiran kembali atau kelahiran

kembali mendahului iman dan pertaubatan.<sup>12</sup> Namun apa yang pasti, kedua pihak menyetujui bahwa kelahiran kembali adalah identitas seorang Kristian yang sejati.

Secara rumusannya, kelahiran kembali boleh dirumuskan demikian: “Kelahiran kembali adalah tindakan Allah yang berdaulat di mana Dia memberikan hidup-Nya dan sifat-Nya kepada orang berdosa yang percaya (Yohanes 1:12-13; Titus 3:5). Kelahiran pertama manusia adalah natural; kelahiran keduanya adalah spiritual dan ajaib. Kelahiran pertamanya membuatnya menjadi anggota kaum yang jatuh; kelahirannya yang kedua membuatnya menjadi anggota kaum yang ditebus. Kelahiran pertamanya memberinya sifat yang bejat (Efe 2:3); kelahirannya yang kedua membuatnya mengambil bahagian dalam kodrat ilahi (2 Pet 1:4). Saat seseorang dilahirkan kembali ia menerima hidup baru (Yohanes 6:47; 1 Yohanes 5:12) dan posisi baru sebagai anak Allah (Yohanes 1:12; 1 Yohanes 3:1-2). Singkatnya, dia adalah ciptaan baru di dalam Kristus (2 Kor. 5:17).”<sup>13</sup>

#### Tanda-tanda Orang yang Telah Lahir Kembali

Seperti yang dikatakan Christian Robirosa, walaupun kelahiran kembali adalah suatu peristiwa yang misteri tetapi hasil daripada kelahiran kembali itu dapat dilihat.<sup>14</sup> Ada beberapa tanda yang Alkitab jelaskan tentang orang yang telah dilahirkan kembali. Tanda-tanda tersebut boleh terlihat daripada tulisan surat Rasul Yohanes. Menariknya, Rasul Yohaneslah yang paling banyak menggunakan istilah lahir kembali dalam tulisannya. Tanda-tanda orang yang telah dilahirkan kembali diambil daripada Surat 1 Yohanes. Terdapat 5 Tanda Lahir Baru orang Kristian:

#### *Pengakuan Iman*

Tanda lahir yang pertama ialah pengakuan iman tentang Yesus Kristus. 1 Yohanes 5:1 berkata: “**Setiap orang yang percaya,**

---

<sup>12</sup> Slick, Matt, Does regeneration precede faith or does faith precede regeneration? CARM, diakses pada 23 Oktober 2021, <https://carm.org/about-theology/does-regeneration-precede-faith-or-does-faith-precede-regeneration/>

<sup>13</sup> Flowers, Leighton, “Does Regeneration Precede Faith? Soteriology 101,” diakses pada 23 Oktober 2021, [https://soteriology101.com/2016/03/09/does-regeneration-precede-faith/#\\_ftn6](https://soteriology101.com/2016/03/09/does-regeneration-precede-faith/#_ftn6)

<sup>14</sup> Robirosa, Christian S., 169.

**bahwa Yesus adalah Kristus, lahir dari Allah;** dan setiap orang yang mengasihi Dia yang melahirkan, mengasihi juga Dia yang lahir dari pada-Nya.” Seseorang yang lahir baru adalah mereka yang benar-benar percaya bahawa Yesus adalah Kristus iaitu Yang Diurapi, yang telah datang ke dunia sebagai Penyelamat manusia. Kelihatannya tanda lahir baru ini begitu mudah tetapi kenyataannya ia tidak semudah yang disangkakan kerana akan menyusul tanda-tanda lahir baru yang seterusnya.

### *Perubahan*

1 Yohanes 2:29 berkata: “Jikalau kamu tahu, bahwa Ia adalah benar, kamu harus tahu juga, bahwa **setiap orang, yang berbuat kebenaran, lahir dari pada-Nya.**” Apa yang ketara selepas seseorang dilahirkan kembali ialah akan adanya perubahan pada hidupnya dari segi dia berfikir, bercakap, bertindak dan berperilaku. Dia akan mengamalkan kebenaran. Dr. David Jeremiah berkata demikian: “Apabila kita mula belajar mengamalkan kebenaran, tabiat kita berubah. Kita tidak akan menjadi sempurna tanpa dosa semasa kita berada di planet ini; tetapi jika kita orang Kristian, kita perlu berkelakuan seperti orang Kristian. Jika kita mengatakan bahawa kita telah diselamatkan tetapi tiada apa yang berubah tentang kita, ada sesuatu yang tidak kena. Kita tidak diselamatkan oleh perbuatan baik, tetapi kita diselamatkan untuk perbuatan baik, dan Injil adalah ejen perubahan dalam hidup kita.”<sup>15</sup>

Di sinilah kita akan mulai melihat kelainan antara orang yang benar-benar telah dilahirkan kembali dengan orang yang hanya mengikuti agama sahaja. Orang boleh mengaku bahawa mereka percaya Yesus adalah Tuhan seperti tanda lahir baru yang pertama di atas tetapi tidak semua akan benar-benar telah diubahkan oleh Tuhan dan hidup mengamalkan kebenaran. Sebab itu Paulus berkata bahawa “Jadi siapa yang ada di dalam Kristus, ia adalah ciptaan baru: yang lama sudah berlalu, sesungguhnya yang baru sudah datang (2 Korintus 5:17).”

---

<sup>15</sup> Jeremiah, David, “5 Birthmarks of the Born-Again Christian,” Crosswalk, diakses pada 23 Oktober 2021, <https://www.crosswalk.com/slideshows/5-birthmarks-of-the-born-again-christian.html>

### *Mengasihi*

Tanda lahir baru yang ketiga ialah mengasihi. 1 Yohanes 4:7 berkata: “Saudara-saudaraku yang kekasih, marilah kita saling mengasihi, sebab kasih itu berasal dari Allah; dan **setiap orang yang mengasihi, lahir dari Allah** dan mengenal Allah.” Tanda ini sangat penting. Pengikut Kristus seharusnya ditandai dengan ini kerana Allah adalah kasih. Jika seseorang mengaku seorang Kristian tetapi sangat membenci orang dan pendendam, ada sesuatu yang tidak kena dengan orang itu. Orang yang benar-benar mengalami kasih Tuhan dan pengampunan daripada-Nya pasti akan terlihat dari sikapnya yang sanggup mengasihi dan mengampuni. Tidak dinafikan ianya mungkin suatu pergumulan yang berat tetapi orang percaya akan ditandai dengan tanda ini.

### *Mengalahkan Dunia*

Tanda keempat lahir baru ialah mengalahkan dunia. 1 Yohanes 5:4 mengatakan: “...sebab **semua yang lahir dari Allah, mengalahkan dunia**. Dan inilah kemenangan yang mengalahkan dunia: iman kita.” Dunia yang dimaksudkan ialah keinginan-keinginan dosa yang ada dalam dunia iaitu keinginan mata, keinginan daging dan keangkuhan hidup. 1 Yohanes 2:15-16 berkata: “Janganlah kamu mengasihi dunia dan apa yang ada di dalamnya. Jikalau orang mengasihi dunia, maka kasih akan Bapa tidak ada di dalam orang itu. Sebab semua yang ada di dalam dunia, yaitu **keinginan daging** dan **keinginan mata** serta **keangkuhan hidup**, bukanlah berasal dari Bapa, melainkan dari dunia.”

Sebaliknya orang yang belum lahir baru, sekalipun beragama, mereka akan tertarik kepada hal-hal duniawi. Mereka akan lebih menuruti keinginan mereka yang tertawan dengan dosa. Ini tidak bermakna bahawa orang Kristian yang telah lahir baru tidak mengalami pencubaan dan godaan. Godaan tetap ada dan orang Kristian juga akan bergumul dengan keinginan-keinginan tadi tetapi mereka sudah memiliki hati yang baru dimana keinginannya untuk menyenangkan Allah adalah yang terutama. Apabila orang Kristian jatuh sehingga menuruti keinginan dunia, dia tidak merasa aman di dalam dirinya. Allah juga akan mendisiplinkannya dan membawanya kembali ke jalan yang benar.

### ***Tidak Hidup dalam Dosa***

Tanda kelima orang yang telah lahir baru ialah tidak hidup dalam dosa. 1 Yohanes 3:9 berkata: “**Setiap orang yang lahir dari Allah, tidak berbuat dosa lagi**; sebab benih ilahi tetap ada di dalam dia dan ia tidak dapat berbuat dosa, karena ia lahir dari Allah.” Ayat ini perlu diinterpretasikan dengan berhati-hati. Ia tidak bermaksud bahawa seseorang itu LANGSUNG TIDAK AKAN BERBUAT DOSA lagi kerana dengan interpretasi sedemikian akan bercanggah dengan bahagian-bahagian Alkitab yang lain yang memang jelas menunjukkan bahawa orang percaya juga jatuh dalam dosa.

Terjemahan ayat di atas dalam Bahasa Inggeris lebih menonjolkan makna yang betul. Ayatnya berbunyi demikian: “*No one born of God makes a practice of sinning, for God's seed abides in him; and he cannot keep on sinning, because he has been born of God.*” Frasa ***makes a practice of sinning*** bermaksud membuat amalan berdosa atau dengan kata lain berdosa itu menjadi sebuah amalan kepada seseorang. Jadi pengertian yang betul dari ayat di atas ialah orang yang telah lahir baru tidak akan menjadikan dosa sebagai amalan hidup.

Perbezaan perlu dibuat di antara “jatuh ke dalam dosa” dan “hidup dalam dosa.” Hidup dalam dosa bermaksud hidup yang terus menerus dikuasai oleh dosa manakala jatuh ke dalam dosa bermaksud ada pada waktu-waktu tertentu orang yang telah dilahirkan kembali akan jatuh melakukan dosa. Orang percaya juga pasti akan bergumul melawan dosa tetapi mereka tidak dengan sengaja ingin terus menerus hidup dalam dosa seolah-olah dosa itu adalah gaya hidup mereka. Roma 6:14 berkata: “Sebab kamu tidak akan dikuasai lagi oleh dosa, karena kamu tidak berada di bawah hukum Taurat, tetapi di bawah kasih karunia.”

Oleh itu, jika ada orang yang mengaku percaya Yesus tetapi hidupnya menunjukkan gaya kehidupan orang yang berdosa dan tiada tanda-tanda pertaubatan, maka orang itu kemungkinan besar belum mengalami kelahiran kembali. Orang yang benar-benar dilahirkan kembali akan kelihatan dari buah-buah kebenaran yang dihasilkannya. Yesus berkata dalam Matius 7:20 “Dari buahnyaalah kamu akan mengenal mereka.”

### Murtad dan Kelahiran Kembali

Isu murtad ada kaitan dengan konsep kelahiran kembali. Di dalam isu ini, ada dua pandangan tentang murtad. Pertama, ada golongan Kristian yang percaya bahawa orang Kristian yang telah lahir baru boleh murtad dari iman Kristian. Kedua, ada pula golongan Kristian yang percaya bahawa orang Kristian yang benar-benar lahir baru tidak akan murtad untuk selamanya. Golongan yang percaya bahawa murtad boleh berlaku kepada orang yang telah diselamatkan ialah golongan Arminian.<sup>16</sup> Sebaliknya golongan kedua pula terdiri daripada golongan Calvinis. Golongan Calvinis percaya bahawa mereka yang murtad sebenarnya adalah golongan yang belum lahir kembali.<sup>17</sup>

Penulis memihak kepada pandangan yang kedua bahawa orang Kristian yang telah lahir baru tidak akan murtad. Murtad hanyalah suatu peristiwa yang membuktikan bahawa seseorang itu belum diselamatkan dan belum mengalami kelahiran kembali.<sup>18</sup> Kesalahfahaman yang sering terjadi adalah apabila seseorang mengaku percaya Yesus pada mula-mula tetapi akhirnya menyangkal Kristus dilihat sebagai orang yang dahulunya adalah orang Kristian yang telah diselamatkan, tetapi setelah penyangkalannya dia dilihat sebagai orang yang kehilangan keselamatannya. Ini adalah pandangan yang keliru.

Ada beberapa alasan mengapa penulis bersetuju bahawa orang yang murtad belum mengalami kelahiran kembali. Yang pertama, Alkitab jelas menunjukkan bahawa memang akan ada pengikut Yesus yang asli dan pengikut yang palsu. Ada beberapa perumpamaan dan pengajaran Yesus boleh membuktikan ini. Contohnya perumpamaan lalang dan gandum (Matius 13:24-30). Jika diteliti perumpamaan ini, lalang yang dimaksudkan ialah sejenis tumbuhan yang sangat mirip dengan gandum. Lalang itu akan membesar seperti gandum dan sangat sukar untuk dibezakan dari gandum asli. Namun setelah sampai waktu tumbuhan itu matang, akan nampak bahawa gandum berisi dengan biji gandum manakala lalang itu tidak berbuah apa-apa dan tetap berdiri tegak.

---

<sup>16</sup> Geisler, Norman L., *Systematic Theology*, (USA: Bethany House Publishers, 2011) 1199.

<sup>17</sup> Oropeza, B.J., *Paul and Apostasy: Eschatology, Perseverance and Falling Away in the Corinthian Congregation*, (CA: Mohr Siebeck, 2000), 15.

<sup>18</sup> Robirosa, Christian S., 195

Lalang dan gandum adalah gambaran anak-anak Iblis dan anak-anak Allah di dunia. Seringkali anak-anak Iblis juga akan kelihatan seperti anak-anak Tuhan yang lain tetapi sebenarnya mereka adalah saudara palsu. James Montgomery Boice memberi penjelasan ini tentang perumpamaan lalang dan gandum: “Iblis sedang mencampurkan orang Kristian palsu di antara orang Kristian sejati untuk menghalangi pekerjaan Tuhan. Jadi itulah pesan sebenarnya. Apakah lapangan itu dunia atau gereja sebenarnya tidak relevan. Intinya adalah bahawa iblis akan membawa orang-orang (baik di dalam atau di luar gereja) sedemikian rupa seperti orang Kristian sejati, namun bukan orang Kristian, sehingga bahkan hamba-hamba Tuhan tidak akan dapat membezakan mereka.”<sup>19</sup>

Contoh kedua dari ajaran Yesus ialah dalam Matius 25:31-46 yang berkisar tentang penghakiman akhir di mana Yesus akan datang dalam kemuliaan-Nya dan mengumpulkan semua bangsa dihadapan-Nya. Yesus lalu dikatakan memisahkan umat manusia dihadapannya seperti memisahkan antara domba dan kambing. Sekali lagi Yesus menggunakan perumpamaan yang mirip seperti lalang diantara gandum. Jika dilihat kambing dan domba lebih kurang sama. Kedua spesies ini buat bunyi mengembek dan makan rumput tetapi ternyata haiwan yang berbeza. Begitu jugalah dengan orang yang belum lahir baru dan Kristian sejati yang telah lahir baru. Keduanya mungkin sama-sama hadir ke gereja, membaca Alkitab dan menyanyi memuji bersama tetapi ternyata mereka berbeza.

Alasan kedua ialah Alkitab mengandungi janji bahawa orang percaya iaitu orang yang benar-benar milik-Nya tidak akan hilang tetapi terpelihara sampai akhirnya. Mengatakan bahawa orang yang telah lahir baru boleh murtad secara kekal akan bercanggah dengan janji-janji Tuhan itu. Contohnya Yohanes 6:39 berkata: “Dan Inilah kehendak Dia yang telah mengutus Aku, yaitu supaya dari semua yang telah diberikan-Nya kepada-Ku **jangan ada yang hilang**, tetapi supaya Kubangkitkan pada akhir zaman.” Jika ada pengikut Tuhan yang sejati murtad dan hilang selamanya, ini sama sekali bercanggah dengan ayat di atas. Itu juga seolah-olah menuduh Yesus menipu dengan janji sedemikian atau Dia gagal dalam melindungi milik-Nya.

Yohanes 10:27-29 menegaskan lagi demikian: “Domba-domba-Ku mendengarkan suara-Ku dan **Aku mengenal mereka** dan mereka mengikut Aku, dan **Aku memberikan hidup yang kekal kepada mereka** dan **mereka pasti tidak akan binasa sampai**

---

<sup>19</sup> Boice, Montgomery, *The Parables of Jesus*, (IL: Moody Publishers, 1983) 22.

**selama-lamanya dan seorangpun tidak akan merebut mereka dari tangan-Ku. Bapa-Ku, yang memberikan mereka kepada-Ku, lebih besar dari pada siapapun, dan seorangpun tidak dapat merebut mereka dari tangan Bapa.”**

Ayat di atas adalah suatu janji yang sangat meyakinkan. Jika Iblis dapat merebut mereka dari tangan Yesus dan Bapa di Syurga, maka kita seolah-olah mengatakan bahawa Iblis lebih kuat dan janji di atas adalah janji kosong semata-mata. Ada banyak lagi ayat-ayat lain yang memberikan jaminan bahawa orang yang sungguh-sungguh percaya iaitu yang telah lahir kembali akan terpelihara oleh Allah. Ini tidak bermakna bahawa orang yang telah lahir baru tidak akan pernah tenggelam timbul dalam imannya tetapi Allah telah memberi jaminan bahawa Dia akan memelihara mereka sampai akhir (Fil 1:6). Jika mereka jatuh sekalipun, Allah sendiri akan mendisiplinkan anak-anak-Nya dan memastikan bahawa anak-anak-Nya kembali ke jalan yang betul (Ibr 12:7-8, Wah 3:19).

Alasan ketiga penulis percaya bahawa orang yang murtad belum dilahirkan kembali adalah kerana Alkitab mengatakan bahawa orang-orang yang meninggalkan kelompok orang percaya sebenarnya tidak sungguh-sungguh termasuk daripada orang percaya. 1 Yohanes 2:19 berkata: “Memang mereka berasal dari antara kita, tetapi **mereka tidak sungguh-sungguh termasuk pada kita**; sebab jika mereka sungguh-sungguh termasuk pada kita, niscaya mereka tetap bersama-sama dengan kita. Tetapi hal itu terjadi, supaya menjadi nyata, bahwa **tidak semua mereka sungguh-sungguh termasuk pada kita.**”

Petikan ayat di atas adalah dalam konteks penulisan Rasul Yohanes tentang para Antikristus. Antikristus boleh didefinisikan sebagai orang yang melawan Kristus. Definisi ini boleh diaplikasi kepada orang yang murtad juga kerana secara takrifannya murtad adalah penentangan atau pemberontakan terhadap orang atau sesuatu. Orang yang dikatakan antikristus oleh Yohanes adalah orang-orang yang dahulunya pernah bersama-sama dengan kelompok orang percaya, mengaku beriman kepada Kristus tetapi akhirnya pergi meninggalkan mereka. Yohanes berkata bahawa mereka itu “tidak sungguh-sungguh termasuk pada kita.” Dengan kata lain mereka ini juga belum benar-benar lahir baru.

### Laporan Kajian dan Analisa

Bahagian ini akan membahaskan tentang laporan kajian dan analisa. Sebelum analisa akan dibahaskan tentang Hipotesis penulis terhadap subjek kajian. Hipotesis itu akan diuji dengan menganalisa

laporan hasil kajian berdasarkan borang kaji selidik yang telah diisi oleh sampel kajian.

#### Asumsi/Hipotesis Penulis

Ada beberapa asumsi dan hipotesis tentang subjek kajian. Hipotesis adalah seperti berikut:

- i. Tahap pemahaman umat gereja Baptis di Sabah terhadap doktrin keselamatan masih di tahap yang lemah.
- ii. Teologi Arminian lebih menonjol dalam isu murtad dalam kalangan umat Baptis di Sabah

#### Metodologi Kajian

Kajian dilakukan dengan menggunakan kaedah kualitatif. Data kajian diperoleh melalui temuramah. Penulis mendapatkan data kajian dengan bantuan 11 orang pastor Baptis Sabah yang mengikuti Kelas Teologi 2 (Soteriologi) yang diajarkan oleh penulis pada 6-17 September 2021. Temuramah dilakukan oleh 11 orang pastor kepada 2 atau lebih jemaat gereja mereka berdasarkan set soalan yang telah disediakan oleh penulis. Hasil temuramah ditulis dan dihantarkan kembali kepada penulis untuk dianalisis.

#### Rumusan Analisa Kajian

Daripada analisa kajian, ada beberapa kesimpulan positif yang boleh diambil seperti berikut:

1. Pada peringkat permukaan, secara keseluruhannya semua responden memahami konsep kelahiran kembali.
2. Secara keseluruhannya juga menunjukkan bahawa responden tahu bagaimana mengidentifikasi seseorang yang benar-benar lahir baru.
3. Majoriti responden mengakui bahawa orang yang telah lahir baru tidak akan terus menerus hidup dalam dosa.
4. Majoriti responden juga mengakui bahawa orang yang lahir baru sekalipun tidak mungkin tidak jatuh dalam dosa.

Selain itu, ada juga beberapa isu yang didapati hasil analisa jawapan-jawapan responden di atas iaitu seperti berikut:

1. Masih ada yang mengaitkan kelahiran kembali dengan baptisan air.

2. Responden kebanyakannya secara tidak sedar berpegang kepada fahaman Arminian yang berpegang bahawa orang yang lahir baru boleh murtad.
3. Namun, ramai responden yang belum konsisten dalam fahaman mereka tentang orang yang lahir baru dan kaitannya dengan isu murtad. Ada ketikanya mereka menjawab bahawa ada kemungkinan terjadinya murtad tetapi pada masa yang sama mereka juga menjawab bahawa orang yang murtad sebenarnya belum benar-benar lahir kembali.
4. Hasil daripada rumusan analisa dan isu yang dibangkitkan di atas, boleh disimpulkan bahawa secara dasarnya, doktrin kelahiran kembali difahami oleh para responden walaupun tidak begitu kukuh lagi. Isu-isu seperti mengaitkan kelahiran kembali dengan baptisan air perlu diambil perhatian oleh pastor sidang. Berkaitan dengan isu murtad, pengajaran tentang erti kelahiran kembali dan erti murtad harus diperhebatkan lagi supaya orang Kristian tahu bahawa murtad hanya membuktikan bahawa seseorang itu bukan murid Yesus yang sejati.

Secara kesimpulannya, hipotesis yang pertama tidak sepenuhnya tepat kerana hasil analisa kajian menunjukkan sudah ada kefahaman dasar tentang doktrin kelahiran kembali. Hipotesis kedua pula adalah tepat kerana fahaman Arminian nampak lebih menonjol dalam kalangan responden. Secara keseluruhannya, penulis tetap berpendapat bahawa Doktrin Kelahiran Kembali perlu diperkasakan dalam gereja Baptis di Sabah.

### **Implikasi dan Cadangan**

Hasil kajian menunjukkan bahawa penguasaan dan pemahaman tentang Doktrin Kelahiran Kembali dalam kalangan umat Baptis di Sabah masih belum kukuh sepenuhnya. Masih ada yang berfahaman bahawa baptisan air menunjukkan seseorang telah dilahirkan kembali. Di dalam isu murtad, ramai yang belum mempunyai pandangan yang jelas sama ada orang yang telah dilahirkan kembali boleh murtad atau tidak. Oleh itu, Doktrin Kelahiran Kembali tetap harus diperkasakan.

### Cadangan-cadangan

Penulis ingin mencadangkan beberapa langkah penyelesaian untuk menangani isu-isu yang dilihat hasil daripada analisa kajian sekaligus dapat memperkasakan Doktrin Kelahiran Kembali di gereja lokal di Sabah. Cadangan-cadangan adalah seperti berikut:

#### ***Perkasakan Khutbah Ahad***

Tempat yang paling berkuasa dan sangat sesuai untuk perkasakan Doktrin Kelahiran Kembali adalah melalui mimbar gereja. Mimbar gereja harus diangkat martabatnya dengan menyampaikan kebenaran. Mimbar tidak seharusnya digunakan untuk menyampaikan celoteh, cerita-cerita yang tidak berkaitan, dan hiburan yang berlebihan. Khutbah hari Ahad di mimbar gereja harus diperkasakan. Bermula dengan perancangan secara sengaja oleh gembala sidang untuk mengajarkan doktrin keselamatan secara sistematik dalam kalendar satu tahun. Di dalam Doktrin Keselamatan itu, bahagian Doktrin Kelahiran Kembali harus ditekankan.

Umat yang hadir harus dicabar iman mereka supaya membuat retrospeksi diri yang jujur sama ada benar mereka telah menunjukkan buah-buah pertaubatan. Isu murtad dan murid yang sejati harus diajarkan supaya jemaat tahu bahawa isu murtad sebenarnya sangat berkait rapat dengan kelahiran kembali. Jika seseorang belum dilahirkan kembali, memang sangat mudah untuk diombang-ambingkan oleh berbagai ajaran dan godaan yang lahiriah kerana belum mengalami transformasi di dalam dirinya secara peribadi.

#### ***Pengajaran Yang Komprehensif di Peringkat Akar Umbi***

Hampir semua gereja pada waktu sekarang mempunyai perjumpaan dalam kelompok yang kecil. Ia disebut dengan pelbagai nama seperti kelompok sel, persekutuan rumah, *care group* dan sebagainya. Inilah yang dimaksudkan penulis dengan peringkat akar umbi. Kelompok kecil ini walaupun kecil tetapi jika dilakukan dengan baik pasti akan membuahkan jemaat-jemaat yang matang dan berbuah di dalam Tuhan. Jemaat tidak dapat bergantung hanya pada khutbah Ahad sahaja. Mereka perlu dididik dari kelompok-kelompok kecil ini.

Gembala sidang berperanan untuk menggerakkan ketua-ketua sel untuk mengajarkan Doktrin Kelahiran Kembali. Namun sebelum itu dilakukan, gembala sidang perlu memastikan bahawa ketua-ketua kelompok sel yang dilantik haruslah sudah menguasai Doktrin Kelahiran Kembali. Jika belum, gembala sidang perlu mengadakan

kelas khas bagi semua ketua-ketua sel supaya mereka dilengkapi sebelum dapat mengajar kelompok sel jagaan mereka.

Akar umbi yang kedua ialah kelas pemuridan. Bagi kelas pemuridan, Doktrin Kelahiran Kembali harus diwajibkan. Setiap yang mengikuti kelas tersebut juga harus dipastikan dapat menguasai doktrin ini dengan sebaiknya. Berbagai bentuk penilaian boleh dibuat untuk menguji tahap kefahaman mereka yang mengikuti kelas pemuridan tersebut baik secara ujian bertulis atau tugas mereka membentangkan atau mengkhutbahkan doktrin itu semasa kelas pemuridan.

### ***Seminar atau Konferensi tentang Doktrin Keselamatan***

Bagi memperkasakan Doktrin Kelahiran Kembali dalam skala yang lebih besar pula, seminar dan konferensi harus dibuat. Program seperti ini boleh dilakukan secara anjuran bersama dengan gereja-gereja yang lain atau pada peringkat denominasi gereja itu sendiri. Seminar atau konferensi mungkin mengambil waktu beberapa hari bagi mengupas beberapa komponen dalam doktrin keselamatan dengan terperinci.

Seminar atau konferensi ini boleh dibuat bagi pelbagai peringkat umur. Bagi pemuda-pemudi, ia boleh dianjurkan kem muda-mudi di peringkat gereja lokal, atau melalui atas talian (*online*) untuk skala yang lebih besar. Bagi orang dewasa memang perlu menghadiri seminar atau konferensi seperti ini. Gembala sesebuah gereja lokal berperanan untuk menganjurkan atau menggalakkan jemaatnya mengikuti program-program seumpama ini.

### **Penutup**

Doktrin Kelahiran Kembali sangat penting untuk difahami kerana kelahiran kembali adalah permulaan kehidupan Kristian yang sebenarnya. Tanpa doktrin ini, Kristian hanya menjadi sebatas agama sahaja tanpa ada transformasi yang berlaku dalam diri setiap pengikut Kristus. Anak-anak Tuhan mempunyai tujuan akhir iaitu untuk menyerupai seperti Kristus dan ini hanya boleh terjadi dimulai dengan kelahiran kembali. Penulis menyeru agar gereja Baptis di Sabah khususnya membuka mata dan mengambil langkah proaktif untuk memperkasakan Doktrin Kelahiran Kembali demi kemuliaan Tuhan dan peluasan kerajaan-Nya di bumi. Amen.

## BIBLIOGRAFI

- “Apostasy.” Cambridge. Diakses pada 23 Oktober 2021.  
<https://dictionary.cambridge.org/dictionary/english/apostasy>
- “Arianism – What is it?” Compelling Truth. Diakses pada 24 Oktober 2021. <https://www.compellingtruth.org/arianism.html>
- “Author of Christian relationship guide says he has lost his faith.” The Guardian. Diakses pada 24 Oktober 2021.  
<https://www.theguardian.com/world/2019/jul/29/author-christian-relationship-guide-joshua-harris-says-marriage-over>
- Berkhof, Louis. *Systematic Theology*. MI: Grand Rapids, 1949.
- Bobby and Dorothy Evans, *Great Things He Has Done!* Petaling Jaya: MBC, 2003.
- Boice, Montgomery. *The Parables of Jesus*. IL: Moody Publishers, 1983.
- Brackney, William H. *Historical Dictionary of the Baptists*. USA: Scarecrow Press, 2009.
- “Doctrine.” Cambridge Dictionary. Diakses pada 22 September 2021.  
[https:// dictionary.cambridge.org/dictionary/english/doctrine](https://dictionary.cambridge.org/dictionary/english/doctrine)
- lowers, Leighton. “Does Regeneration Precede Faith? Soteriology 101.” Diakses pada 23 Oktober 2021,  
[https://soteriology101.com/2016/03/09/does-regeneration-precede-faith/#\\_ftn6](https://soteriology101.com/2016/03/09/does-regeneration-precede-faith/#_ftn6)
- Geisler, Norman L. *Systematic Theology*. USA: Bethany House Publishers, 2011.
- Grudem, Wayne, *Systematic Theology: An Introduction to Bible Doctrine*. MI: Inter-Varsity Press, 1994.
- Holmes, Stephen R. *Baptist Theology*. London: T&T Clark International, 2012.
- Jeremiah, David. “5 Birthmarks of the Born-Again Christian.” Crosswalk. Diakses pada 23 Oktober 2021,  
<https://www.crosswalk.com/slideshows/5-birthmarks-of-the-born-again-christian.html>
- “Memperkasakan.” Dewan Bahasa dan Pustaka. Diakses pada 22 September 2021.

<https://prpm.dbp.gov.my/Cari1?keyword=memperkasakan&d=175768&>

- Naselli, Andy. "What Is Apostasy? Can a Christian Become Apostate?" The Gospel Coalition. Diakses pada 23 Oktober 2021. <https://www.thegospelcoalition.org/essay/apostasy-can-christian-become-apostate/>
- Oropeza, B.J. *Paul and Apostasy: Eschatology, Perseverance and Falling Away in the Corinthian Congregation*. CA: Mohr Siebeck, 2000.
- Robirosa, Christian S. *Jalan Pasti ke Sorga*. Batam, Sony Light, 2012.
- Schaff, Philip. *History of the Christian Church*. MA: Hendrickson Publishers Inc., 2006.
- Slick, Matt. Does regeneration precede faith or does faith precede regeneration? CARM. Diakses pada 23 Oktober 2021. <https://carm.org/about-theology/does-regeneration-precede-faith-or-does-faith-precede-regeneration/>
- Sproul, R.C. *What Does It Mean to Be Born Again*. MI: Grand Rapids, 2010.
- Washer, Paul. *Ten Indictments Against the Modern Church*. USA: HeartCry Missionary Society, 2008.
- "What is apostasy and how can I recognize it?" Got Question. Diakses pada 23 Oktober 2021. <https://www.gotquestions.org/apostasy.html>
- "What is apostasy and how can I recognize it?" Got Question. Diakses pada 23 Oktober 2021. <https://www.gotquestions.org/apostasy.html>